



DROGHE & PRIMIZIE

Memoie de un vegio zeneise

di Enrico Carbone (RICE)

A-a primma vista o centro de Zena o no l'é cangiòu guaei: via Vinti Settembre, via Vintiçinque Arvì, via Romma, ciassa De Ferrari co-a fontanna. A l'aveiva unze metri de diametro e a pesava all'incirca vintiçinque tonnaei de bronzo: l'aveiva regallà a Zena l'insegnè Carlo Piaggio a compimento do voto pe Giuseppe Piaggio, morto inte n'incidente aereo into 1930 secondo a scrita in scià base da fontanna (oa quaexi illeggibile), *Tenace affetto di ligure / superando il destino / alla sua città donava / XXIV, V, MCMXXXVI*.

A fontanna a l'éa staeta progettà e costruìa da l'architetto Giuseppe Crosa de Vergagni e a preveveiva diversci zeughi d'aegua, asci a colori.

Inte questi urtimi anni i amministratoi da nostra cittàe han faeto fà de modifiche in sce quali preferiscio non esprimme a mae opinion.

Dixeivo a-o principio che tante cose no son cangiae, armeno in apparenza. Questa votta veuggio di due poule comme l'é cangiòu o commercio a-o menùo, in particolare i droghè e butteghe de "primizie".

In via XXV Arvì (da-o Carlo Felice) gh'èa *Banchieri e Sanmichele*, unna grande drogheria a fianco da Farmacia Moncatelli (anche quella sparia).

Ean doi negozi, belli e spazosi, che rappresentavan quaexi un'isoa in to cheu da cittàe. A drogheria – fra e atre specialitae – a vendeiva i coscidity lieviti istantanei pe fà dosci, torte e fugasse, senza dovei aspettà o tempo da lievitàsion, 'na novitae pe-i anni trenta.

A farmacia, doppo l'intrata, a s'arviva inte un grande salon ch'o paiva 'na sala da ballo, atro che vende ceotti e mexinn-e!

In via Vinti Settembre – dove gh'èa o Teatro Margherita – i g'aveiva e vedrinn-e Crastan, foscia o

ciù bello droghè de Zena e d'Italia che o tegniva e specialitae ciù strane e meno conosciue. Me sovven d'avei mangiòu a Pòla un doçe ch'o m'èa piaxùo tantiscimo, a *gubana*, 'na specie de strudel che a Zena ho trovòu doppo lunghe e noiose ricerche solo da Crastan. Comme da Crastan ho trovòu un doçe turco da Istanbul, i *rahat lokoum*, che o piaxeiva tanto a mae moggè (ma alloa èimo ancon galanti).

In Canneto o lungo gh'èa Isoabella co-a gente feua da porta che a faxeiva a coa pe intrà. Pe a veitae tra via S. Bernardo e via Ciabrea gh'è 'na buttega ch'a vende, da-o peive a-o saffran, tutti i prodotti coloniali ciù strani pe-a cuxinn-a.

A-a Maddenn-a me sovven Baghino ma foscia sbaglio o nomme. Ho ben presente invece a drogheria Rondanina inta montà de Santa Catiaenna, co-a zona pe vende bibite. I droghè éan un po' dappertutto: da San Fruttuoso (in via dell'Albero d'oro o in via Torti), a Marassi, a Sturla, in Arbà.

Ma gh'èa 'n'atra serie de butteghe che son sparie, pe motivi che saieva lungo e noioso elencà ma che se peuan facilmente capi: i negozi de "primizie".

Fasso un esempio: *Marzo, sexe a l'assazzo, Zugno, sexe a pugno*. Ma mae mamà – savendo quanto me piaxessan a e trovava asci d'Arvì, da quarche buttega de primizie pagandole 'n'euggio da testa. Gh'èa primizie da fruta ma asci da verdù. E primme artiococche, i primmi spaeghi, i primmi zucchin, i primmi puisci, ecc. ecc.

Concludo con un faeto che o me capitòu inti anni quarantadui o zu de li.

In vico Stella, vixin a-o Banco de Ciavai, dove travaggiavo, gh'èa 'na buttega de primizie. Inta vedrinn-a aveivo visto 'na corbetta de fighe scioi e me vègnùo coae de portane quarchedunn-a e mae gente (poae e moae) ad Avegno dove èimo sfollae. Finìo o travaggio, passo inta buttega de primizie e me fasso acaia unna doxenna de fighe inta mae valixetta che aveivo accattàu da Pastò in ciassa Neuva ⁽¹⁾; a l'éa de carton ma a paiva de cheuio e a faxeiva a sò figù.

Mae papà quella seia o l'aveiva piggiòu o treno primma de mi e o l'éa sa arrivòu a casa. *Vo portòu 'na primizia, diggo intrando in ca e tio feua a mae fiche. Quanto ti l'é pagae?* o me dixè o papà. *Parole e dinae ghe rispondo. Queste invece no costan ninte perché o me l'ha regallae o mae amigo Razin*, o risponde mae poae.

Ghe son restòu mä, li per li. Ma no son guarìo da-a coae de primizie, a-a faccia do risparmiu e dell'economia.

Ma a-a giornà d'ancheau purtroppo o pe fortunna a i negozi de primizie ne restòu pochi.

NOTE

(1) Se trattava de un negozio de Pastore specializzòu in borse e valixe in ciassa Matteotti, alloa ciassa Umberto I, poi pe poco tempo anche ciassa Ettore Muti, da fa di a un zeneise riso reao che a l'é a ciassa di morti ammazzae.

ILLUSTRAZIONI

a p. 10: Antica cioccolateria dal volume "Dolce Liguria" di G. Ortona e E. Casati – De Ferrari Editore, Genova 1998. Per cortese concessione della signora Gigliola Ortona.